

BUBALI Y RIFNAN NA LAGO TA CENTRO DI PARHA Y ATRACCION TURISTICO

ORANJESTAD(AAN)— Den un comunicado, ricibi di Stinapa Aruba, ta ser treci dilanti cu durante e ultimo añanan a sali mas cu un biaha den publicidad cu Aruba ta uno di e lugarnan mas importante caminda meuchinan ta broei. E lugar exacto na Aruba ta e rifnan dilanti di Lago.

Stinapa Aruba conjuntamente cu diferente otro instancianan manera Pocile, algun departamentonan di Lago y APA na Lago lo trata di haci e año 1985 loke ta concerni broeimento di meuchi un exito.

Pa medio di e cooperacion di e instancianan menciona, subsidionan cu Stinapa Aruba a haya for di Natuurfonds di Hulanda y pa e presencia di Biologo Drs. Ruud van Halewijn durante 19 di Mei te cu

9 di Juni, e temporada di broeimento na 1984 a bira un exito.

Stina Aruba ta spera di haya e año aki cu un subsidio di Bird Preservation na Hulanda, un especialista di parha pa mitar año. Durante e mitar año tin e posibilidad pa haci un inventario di e rifnan rond di Aruba y di e plas na Bubali.

Seguramente awor cu Aruba ta bay pasa den un temporada difícil, caminda enfasis ta ser poni ariba turismo, e trabao cu Stinapa ta haci por contribui positivamente na e sector aki.

E plas na Bubali y e rifnan ta forma algo unico den nos region.

Segun e comunicado di Stinapa Aruba, e cantidad di meuchi cu ta broei ariba e rifnan a aumenta di 3300

pareja na 1983, te 4000 na 1984, loke ta algo masha positivo. Pa e resultado positivo aki, mester gradicidi especialmente instancianan cu a yuda y e pueblo en general. Promer hopi webó tabata ser pidi pa consumo y a ser ripara cu esaki no a socede na 1984. Stinapa

Aruba ta spera cu esaki

lo conta pa tur e añanan cu ta bini.

Esnan cu ta interesa pa observa e diferente sorto di meuchi por ser aconseja pa bay rond di April y Mei na e Santana di Cachor ariba e tereno di Lago. Aki por observa parhanan sin estorbo. E rifnan ta zona prohibi pa bishita entre April y

Augustus.

Stinapa Aruba finalmente a expresa e deseo cu tur instancia concerni lo aporta pa e año aki tambe bira un exito. Tambe ta ser spera cu e Pueblo lo realiza ki importancia nos naturaleza tin pa Aruba. Mantene naturaleza pa nos generacionnan cu ta bini ta deber di uno y tur.

PROMOCION TURISTICO NA HULANDA

ORANJESTAD(AAN)— Recientemente e Jefe di Oficina di Turismo na Aruba a realiza un viaje pa Europa den cuadro di promocion turistico pa Aruba. Na Hulanda, Dr. Rory Arends hunto cu personal di Arubahuis a realiza presentacion pa promocion turistico den diferente ciudad manera Utrecht, Arnhem, Eindhoven, Amsterdam y Den Haag.

E asistencia y interes di agentenan di viaje Hulandes tabata enorme, mas aun cu e año aki a tuma lugar un combinacion di promocion entre Aruba y Bonaire.

E Hulandesnan ta masha interesa den un promocion combina esta dos destinacion.

Guianan di viaje di diferente empresa viajero tin Aruba como destinacion pa vacacion den nan pro-

grama pa año 1985.

Personal di Arubahuis bao guia di señor Miro Dabian a realiza un bon trabao ariba e tereno di promocion.


Dr. Rory Arends a haya bon cooperacion di e personal di Arubahuis.

Ewald Biemans di Talk of the Town tambe tabata presente hunto cu Henri Martinez, kende a cordina e promocion pa Bonaire.



ORDENANZA PA PERMISO

Bestuurscollege di Aruba ta anuncia cu entrante 29 maart 1985, durante 14 dia lo tin oportunidad pa un y tur pa tuma conocimiento na Bestuurskantoor, Departamento pa Asuntunan General y Juridico di un peticion cu a ser haci pa obtene permiso pa vende bebida cu poco alcohol (manera cerveza, biña etc.) den un localidad den Dakota Shopping Paradise, situa na Fergusonstraat 51, pa worde consumi otro caminda cu den e localidad (Kiosk) den cual ta worde bendi. Durante dicho termino di 14 dia tur hende tin e derecho di laga sa por escrito su obheccion contra di dunamento di e permiso aki.



DIABIERNE SANTO

5 di April

10'00

di mainta en punto
nos ta sali cu peregrinacion cu
vehiculo for di misanan di
Noord y San Nicolas, bay

SPORTHAL
sigui pa

CERO DI NOCA

NA CAMINDA
PA SU CRUZ

Comision Juventud '85
ta pidi tur joven y nan mayor
pa participa.

REPERSENTANTENAN DI CAO CERCA DIPUTADO BAREÑO



ORANJESTAD(AAN)— Señor Dooley Tromp, Presidente di e grupo di trabao Comité Olimpico Arubano, a reuni antayera cu Diputado di Deporte, Grace Bareño.

Durante e reunion

señor Tromp a haci entrega di un carta cu ta menciona cu e grupo di trabao a ser institui pa mayoria di e bondnan deportivo ariba nos isla y cu e grupo di trabao aki ta tratando na yega na

fundacion di un Comité Olimpico Arubano.

Señor Dooley Tromp a ser acompaña pa e miembro di e grupo di trabao, Milo Croes, den presencia tambe di Jerry Gomez di Idefre.